

Pi actuala savess l'ovra betg esser

Igl ewz ò inauguro l'ovra electrica pitschna Nandro



Represchentants digls cumegns cugl consegl digl martgea da Turitg sa legran digl nov implant electric pitschen Nandro: **Giancarlo Arpagaus**, cumegn Savognin; **Dolfi Poltera**, cumegn Mulegns; **Andreas Türler**, consegl digl martgea Turitg; **Carmen Dedual**, cumegn Riom-Paronz e **Gion Francestg Schaniel**, cumegn Tinizong-Rona.

FOTOS G. N. STGIER

DA GION NUTEGN STGIER / ANR

■ **An preschientscha dallas instanzas politicas cantunales, regionalas e communalas ò igl ewz inauguro igl implant electric pitschen Nandro. Investos en nias 23 milliuns francs e siva dus onns lavour ins ò surdo glindesde passo l'ovra agl travagl.** Tge muntada tgi igl ewz ò pigl martgea da Turitg, pigl cantun ed er per noss cumegns ò confermo la prominenz politica tgi è stada preschainta tar l'inauguraziun dalla nova ovra electrica pitschna Nandro. Tranter igls blers giasts era *Andreas Türler*, cun-

segl digl martgea da Turitg, cunsiglier guvernativ *Mario Cavigelli* e divers mastrals da Surses. An en rom festiv è nia surdo igl implant electric pitschen agl travagl, bung dus onns siva tgi igl ewz ò scumanzo cun las ampremas lavours. Profito da chella gronda lavour on cunzont er interpresas dalla regiun ed eneda duple è sa musso tgi igl ewz è betg angal en bung partenari digls cumegns, mabagn er en cliaint fidevel dallas firmas indigenas. Digl reminent è igl ewz er en grond patrung. Radond 100 persungas aint igl Grischun gudognan lour pang da

mintga de tar las Ovras electricas digl martgea da Turitg. Cugl ewz vegia er igl cantun en fitg bung partenari e cunzont er en partenari fido, ò detg cunsiglier guvernativ *Mario Cavigelli* an sies pled da festa. Angal bungs plets pigl cantun e pigl Grischun central ò alloura er catto igl consegl digl martgea da Turitg, *Andreas Türler*. Aint igl Grischun central vinga alla fegn finala produtgia gist en terz digl current tgi igl martgea da Turitg dovra an en onn. Digl current tgi igl ewz produtgescha aint igl Grischun central ed an Bergiaglia geian angal 13% an di-

recziun Turitg, igls oters 87% restan aint igl Grischun, ò menziuno Andreas Türler. Tge muntada tgi la nova ovra electrica pitschna Nandro vegia pigl martgea da Turitg demossa er tgi igl parlamaint digl martgea da Turitg vegia delibero igls 13 milliuns francs unanim cun 111 tar 0 vouchs. Chel resultat cler demossa tgi tot las parteidas stettan davos las ovras hidraulicas e davos igl ewz, ò accentuo igl ot giast digl martgea da Turitg.

Current per 2200 casals

Avant dus onns, cura tg'ins vegia scumanzo cun las amprenas lavours, ins vegia betg savia tgi tar l'inauguraziun digl implant electric pitschen Nandro seia la forza hidraulica igl tema central dalla energiea svizra. Vurdo or da chella vista, saptga la nova ovra electrica ainten la Val Nandro betg esser pi actuala, ò menziuno Andreas Türler. Cun realisar chel project produtgescha igl ewz duple current tgi tanscha per 2200 casals. Chegl seia 1% digl current tgi igl ewz produtgescha aint igl Grischun. Alla fegn da sies pled ò igl pi «ot» schef digl ewz detg tgi l'interpresa vigna er ad investar venavant aint igl Grischun central. Gio igl 2012 seia previa d'inaugurar la nova stolla agl Lai da Solas e la sanaziun dall'ovra hidraulica Tinizong vigna ad esser egnà dallas proximas grondas investiziuns.

Fatg da nov la lengia

Avant 40 onns ò igl ewz tschaffo l'ava digl ragn da Radons e mano chella tras ena lengia dad 1,2 km tar la stolla tar igl

Gôt Treid, tgi sa catta sot las aclas da Tiglia. Da lò vo l'ava digl ragn da Radons tras ena stolla da 2,4 km tar ena centrala d'ava, noua tgi er l'ava da Marmorera vign vetiers. Venavant vo l'ava dalla Val Nandro, inclus chella da Marmorera, tras ena lengia da pressiun vers la centrala da Tinizong, noua tgi ella fò alloura eir las turbinas per la producciun digl current. Oramaias ò igl ewz igls davos 40 onns gio fatg adiever dall'ava digl ragn da Radons sainza nizigier la part soura per produtgier current. An connex cun la sanaziun dalla lengia ins ò gist lia nizigier l'ocasiun da far ena ovra hidraulica lò noua tgi l'ava digl ragn da Radons vo ainten la stolla tgi magna l'ava a Tinizong. Igl ewz è sa decidia per ena nova lengia ed ò renunzgia alla sanaziun dalla lengia existenta. Igl argumaint tgi igl ewz è sa decidia per la varianta dad ena nova lengia è er sto chel tgi'ins pudess nizigier chels 78 m differenza d'otezza tranter la tschaffada digl ragn da Radons tar igl «Punt Pajer» e la caverna cun far ena ovra hidraulica pitschna. Anfignen ossa curriava scu gio menziuno l'ava sen chel tratg sainza esser nizigeida. La lengia ò pitia cun igl decurs digls onns, uscheia tgi ella corrodava e vetiers è nia tgi la lengia era periclitada antras la pressiun dalla muntogna. Ena gronda labour è alloura stada tar la nova lengia da buglier ansemen igls beischens da 12 m ed 1,20 m diameter. Ossa corran an ena secunda 2300 l ava tras la nova lengia. Radond 500 tonnas fier ins vegia mess ainten

chella lengia, è nia detg glindesde passo tar l'avertura digl nov implant electric pitschen Nandro.

320 camiuns material

Per la producciun d'electricitad cun l'ava digl ragn da Radons è neida fatga ena caverna ainten la crepla. La stolla d'antrada dalla caverna ò ena lunghezza da 12 m ed ena larghezza da 4,10 m. La caverna scu tala è prest 20 m lunga e ca. 10 m largia. Lò noua tgi igl generatour e la turbina, igls indrezs per produtgier igl current sa cattan, è l'otezza dalla caverna 14 m. Bung 3200 m³ material ins ò piglia or dalla caverna. Chegl èn 320 camiuns material. Per betunar igl intern dalla caverna ins ò alloura duvro 140 camiuns betun. La stolla existenta, cun ena lunghezza da 2,4 km davent dalla caverna an direcziun Tinizong, è neida sanada e dad ena vart da chella sa cattan igls beischens per igls numerous cabels tgi dovra.

Er luvro igl anviern

Cun esser l'antrada dalla caverna an en li noua tgi dat adegna puspe lavegnas ins vegia igls dus davos anvierns adegna gia contact cun la gruppa da salvamaint da Savognin Pendicularas SA ed an spezial cuagl schef da chella, *Marco Gianiel*. Per pudeir luvrar aint igl intern dalla caverna èn igls luvrants ias sen igl plazzal cun en ratrac. Cun pudeir luvrar er igl anviern è sto pussebel da tigneir aint igl plan da termins.

EWZ 1



Plascheir er tar igl represchentant digl cantun e digl ewz Grischun central: Mario Cavigelli, cunsigliar guvernativ; Andreas Türler, martgea da Turitg e Markus Clavadetscher, schef ewz Grischun central.